



[Campus Life](#)

UMPSA perkasa Juruaudit AQMS, pacu lonjakan kualiti akademik

31 March 2026

PEKAN, 31 Mac 2026 – Dalam usaha menangani cabaran kebolehpasaran graduan, ketekalan kualiti program dan keperluan kemahiran Era Revolusi Industri 4.0 (IR4.0), Universiti Malaysia Pahang AI-

Sultan Abdullah (UMPSA) terus memperkukuh tadbir urus akademik melalui Bengkel Pemantapan Juruaudit *Academic Quality Management System Undergraduate (AQMS-UG)* yang berlangsung di UMPSA Pekan hari ini.

Pendekatan ini selari dengan keperluan pematuhan standard yang digariskan oleh *Malaysian Qualifications Agency (MQA)* serta penekanan terhadap *Outcome-Based Education (OBE)* dalam memastikan hasil pembelajaran program benar-benar memenuhi keperluan industri.

Bengkel ini menghimpunkan pensyarah dan pegawai akademik bagi memperkasa peranan juruaudit dalaman melibatkan 22 prosedur utama AQMS-UG.

Usaha ini turut relevan dengan dapatan Kajian Pengesanan Graduan oleh Kementerian Pendidikan Tinggi Malaysia yang menunjukkan kadar kebolehpasaran graduan negara kekal tinggi, namun berdepan cabaran ketidakpadanan kemahiran apabila sebahagian graduan bekerja di luar bidang pengajian.

Justeru, pengukuhan audit dalaman dilihat sebagai mekanisme penting bagi memastikan keselarasan antara kurikulum, pelaksanaan pengajaran dan keperluan sebenar industri.

Pengarah Pusat Jaminan Kualiti Akademik (PJKA), Profesor Madya Ir. Ts. Dr. Juliawati Alias berkata, fungsi audit dalaman kini melangkaui semakan pematuhan semata-mata.

“Juruaudit berperanan mengenal pasti jurang antara reka bentuk kurikulum dan pelaksanaan sebenar, sekali gus memastikan tindakan penambahbaikan dilaksanakan secara berimpak,” ujar beliau.

Sesi bengkel diteruskan oleh Pengarah Pusat Verifikasi Kualiti (QVC), Profesor Madya Ts. Dr. Mohamad Shaiful Abdul Karim memberi penekanan kepada amalan terbaik audit dalaman AQMS-UG yang telah dilaksanakan sejak 2015.

Perbincangan turut menyentuh isu kritikal seperti ketidakselarasan eviden OBE, kelemahan dokumentasi kursus serta cabaran memastikan kesepadanan antara penilaian dan hasil pembelajaran pelajar serta isu-isu yang sering dikenal pasti dalam audit dan akreditasi program.

Dalam konteks persaingan global, pengukuhan sistem jaminan kualiti turut berkait rapat dengan reputasi institusi, termasuk penilaian seperti *QS World University Rankings* yang menilai aspek kebolehpasaran graduan dan kualiti akademik.

Justeru, pemantapan audit dalaman dilihat sebagai mekanisme penting bagi memastikan standard program kekal konsisten dan berdaya saing.

Menurut peserta, Ts. Dr. Abdul Sahli Fakhruddin dari Fakulti Komputeran (FK), bengkel ini meningkatkan kejelasan terhadap prosedur audit dan memperkukuh keupayaan menghasilkan laporan yang lebih tersusun serta memenuhi keperluan standard semasa.

Penganjuran bengkel ini selaras dengan aspirasi Pelan Strategik UMPSA30 dalam memperkukuh tadbir urus akademik dan sistem jaminan kualiti.

Pendekatan berasaskan audit yang sistematik ini dijangka membantu universiti melahirkan graduan yang lebih kompeten, beradaptasi dan memenuhi tuntutan pasaran kerja yang semakin dinamik.

Disediakan Oleh: Zahiruddin Mohd Zain, Pusat Jaminan Kualiti Akademik (PJKA), Pusat Pengurusan Strategik Dan Kualiti (PPSK) dan Jamilah Bebe Mohamad, Pusat Bahasa Moden (PBM)

- 26 views

[View PDF](#)